

人和部

人類志 附風俗

學校志

選舉志 附仕官

蒙化志

稿第四冊

蒙化縣教育局圖記

蒙化志稿卷十六

蒙化梁友憶君與氏編輯

人和部

人類志

滇古西南夷居民種類複雜獨蒙化僻居西鄙爲南詔故墟初
僅羅羅摩蒲落蠻二種間有白人苗人亦寥寥也茲特分別種
類與漢回并志之

漢族多係明初設衛屯田官軍之裔及官商經離亂而流寓者其
籍以吳楚豫章爲最巴蜀次之餘省則寥寥也故凡慶弔喪祭飲
食居處等均與中州無大異

回族其先阿剌伯人元初從世祖取雲南遂占籍及明洪武中傳
友德沐英平蒙化隨征來者留屯田厥後歷年旣多種族蕃盛其
俊秀者皆讀書儼然入庠序掇科甲登仕籍次爲農次爲商然皆
聚族而居不與漢人通嫁娶最盛莫如乾嘉間計大小一十八寨
與城外之人文巷公郎之回營以及零星散處約三千餘戶二萬
餘丁口至道光末回漢忽相仇尋於咸豐初杜逆首禍擾亂滇中
搶奪數十州縣竊據十七八年迄同治壬申癸酉始平之則幾無
噍類矣承平至今幾五十年休養生息漸臻蕃庶多聚居三勝約
之樹濃村回悔登西蓮花營尾村巡檢約之大小圍埂晏旗廠東
蓮花白沙空五摩力大倉約則三家村馬米廠深溝村公郎則五

甲南澗仁里則含鐵村沙羅漾鼻則上下街其他如近城甸中與
新鄉之貝貝祿瓦怒巴則又晨星落落日其人性堅忍勤苦耐勞
不嗜煙酒忌豕肉多食牛羊雞鴨日念西域經數次每七日一禮
拜十三月則大禮拜一月謂之把齋齋日見星月然後飲食男子
悉集清真寺婦人則在家又素有潔癖凡兩便後必沐浴不用盥
器恆以銅壺澆之婦人胸常帶一巾搭肩上嫁娶不擇日不合婚
聘時用糖四合首飾四色間亦有用聘金者納采用衣飾一二事
吉期必招五師台念喜經餘禮與漢略同人死無棺槨臨終招五
師台念經淨洗之以利刀薙其肢體朝死夕葬以木篋舁之出不
拘時日山向專用子午面朝西墳墓亦與漢人有同異

裸羅有二種一種即古之羅羅摩爲哀牢九族之一唐南詔細奴邏後也一種爲蒲落蠻即古百濮周書所謂微盧彭濮是也後訛濮爲蒲類雖不同俗亦近似多山居占蒙化之大多數約一萬一千六百餘戶其在蒙城安遠兩鄉及南澗五里公郎四里者皆以耕種樵薪牧養爲業衣羊皮貧則麻布其富者間亦學漢式多短衣婦女衣服如漢裝或缺其前以布裙半截圍之餘用氊作一襠負諸背如月形以青布裹頭用銀製如菱角狀訂四角又以十餘菱角爲耳墜名芝麻鈴常跣其足亦有穿鞋者疾病不服藥惟信鬼用阿閉禳之阿閉者漢言巫司也以二月八日爲年是日必將道路攔塞祀密枯各村皆置密枯樹祀時以黃牛一繩繫於旁祝

之祝訖一人持利斧劈牛首後按人數分割以歸近來此事漸廢多以松枝之有三叉者代密枯樹位置於屋之左右以祀之其素所慣祀者曰打靛苗遇期以雞髀爲卜祝即其細孔以竹籤穿之或用雞下腮之嫩骨有三叉者視其高下長短向背離合爲吉凶近又用松枝長三寸許剖作二擲之地分陰陽以定一年休咎男女皆少聘七八歲即婚娶娶三日婦即歸及長或有子始還夫家婚喪宴客恆以笙簫雜男女踏歌時懸一足作商羊舞其舞以一人吹簫笙居中以一二人吹簫和之男女百餘圍繞唱土曲其腔拍音節皆視笙簫爲起止喪葬亦用棺無木主人死椎牛而祭用阿閉念夷經念訖令喪主往山中指一樹取之歸刻作人形供奉

三代後則藏之深山大空心樹中祭必設尸其族以大宗爲貴隔
年一祭祖依村旁大樹下名曰認祖有生子者入酒與族衆共飲
明日同聚族長家認高曾凡喪禮親戚哭諸室朋友哭諸靈次居
喪者衣帽皆褐服闋始易以布性嗜酒每會飲無不醉所居多茅
舍間亦有瓦房夜無衾榻房中置一大火爐以土砌三面爲床翁
婦子女悉繞臥其側朝夕即於其上作飲食分爨則以少子住主
房其居東山之黃草壩禱雨村麻楷房及新興鄉者俗名白裸羅
言語小異婚喪禮亦略同間有用木主者聘多用雞酒以香卜餘
無大異云

白人古白子國之支流也南詔時徙大理屬民實蒙化者現止四

十餘戶聚居落摩杵蜡五子坡猪街子等處每正月十六則跳神唱燈婚喪禮與漢人略同習俗亦不甚相遠上者能讀書其他力田務本或服役公府此蓋其善變者與

苗人亦古三苗之裔蒙化現有二種一花苗一白苗皆以其服之色名之在阿克塘江邊一帶及公郎之白石岩白馬箐土莫塘母底羅箐頭共五十餘戶居以柴棚無房屋男子則套頭短衣女子統裙凡飲食少者於長者前一揖相請然後圍聚飲食夜亦男女圍繞而臥以獵爲生善用鳥槍見禽獸無不獲者

風俗附

氣運之盛衰風俗實爲之故一郡一邑之風俗亦足覘天下天下

者郡邑之所積也蒙郡處滇末地僻而俗儉舊志稱氣暖風和民
純土樸男安耕讀而憚經商女樂紡織而薄脂粉語言質實不事
浮夸服食淡泊不趨奢靡鄉黨勉於忠厚士夫恥尚奔趨凡婚喪
燕祭一準乎禮尚矣顧自兵燹後漸即澆漓然視他邑猶質也光
緒間煙土風行商賈雲集於是薄勤儉趨勢利競奢華士鄙經書
而豔貿遷農忘耕鑿而較輜銖工棄技藝而權子母冠婚燕會至
八九日殯葬弔唁集數百人一召客卽珍饈一被體必文繡富者
爭鬪驕奢貧者強撐局面舉國若狂不知胡底間有二三悃悃者
不非笑則唾罵之矣邇來時局變遷禮教廢弛凡婚喪葬祭及一
切服食器用厭儉樸尚新奇益奢僭而無等婦女尤甚焉且生計

日艱人愈趨利其黠者則挺而走險無識者尤而效之往往衣冠其體而寇盜其行夫禮義廉恥國之四維四維不張無形之亂較諸刀兵水火盜賊尤爲可憂况復崇釋信道蒙段餘習猶存也喜鬪終訟顓愚故態依然也慳守故聞私圖封殖則自來學士大夫通病也祝壽慶生濫用屏帳又豪侈不自量者所爲也有言教身教之責者其將何以謀補救乎天下事窮則變變則通時至今日亦可謂窮奢極侈矣吾不知將來變復奚若耶漢書以剛柔緩急繫乎水土爲風好惡取舍隨乎君上爲俗顧天下容有不易得之循良斷無不可變之風俗昔召父蒞南陽易商賈爲本業文翁治巴蜀化譏刺爲文章返樸還純黜浮崇實在上之政教何如耳故

太上變化之其次愧厲之其次教誨之最下者嚴爲禁若夫元旦
賀年元夕張燈清明掃墓端陽弔屈七夕乞巧中元祀先中秋賞
月等俗與通省同且與通國無異無煩贅書云

蒙化志稿卷十七

蒙化梁友憶君與氏編輯

人和部

學校志

國家設學校所以收天下之才俊子弟養之於庠序之中使之成德達材明先聖之道通當世之務出爲公卿大夫分猷而共治故於學設生員又設學師以教導之攷唐書儒學傳國學始置生七十二員取三品以上子弟若孫爲之太學百四十員取五品以上四門學百三十員取七品以上郡縣三等上郡學置生六十員中下以十爲差上縣學四十員中下亦以十爲差此生員之名所自

昉也明初諸生無不廩食於學洪武初令在京府學六十人在外
府學四十人州學三十人縣學二十人日給廩膳聽於民間選補
其後以多才之地許令增廣宣德三年遂定爲額如廩生之數後
又有軍民子弟俊秀待補增廣之名久之乃號曰附學清沿明制
於府學設附生二十名廩生四十名增廣如廩額州縣以十爲差
凡學皆有廟廟祀孔子配以顏曾諸賢及歷代先賢先儒每歲春
秋仲丁率諸生行釋奠禮又復設書院義學等厚其廩餼以培養
之然鄉科歲試及平日所課專以時文上以是教下以是學而學
校於是乎濫矣清季變政停歲科試罷科舉廢學官令各州縣設
學堂置勸學所而學校一變孟子曰三代共學皆以明倫今且將

去人倫矣有世教之責者其亟於學校加意哉志學校

文廟

蒙化廟學置自明洪武中舊爲州學後改府天順間教授吳憲土知府左琳土舍左晏并武職葛升楊杲楊能等以舊制卑隘市地增建成化初重修者土知府左瑛訓導賀游楊遇興也其建堂鰲池者則十六年通判姜永賜經歷何孟濬也建尊經閣易門鑄器置田者則土舍左輓義官張聰也宏治嘉靖間侍御金獻民兵備道姜龍相繼增修土知府左正益加修葺增所未備通判薛希周又復鑿池豎欄建坊繚牆焉厥後兵備道楊秉鉞同知朱孟麟復重修之萬歷四十七年廟災請於巡按御史潘濬即舊址重建者

則同知許尙也清初殿廡傾壞捐修之者副將王鳳岐也教授李
啟華又重建啟聖祠康熙二十二年奉文修學同知金標始捐修
殿廡建名宦鄉賢兩祠土知府左世瑞復建成賢養士坊二十八
年同知楊天眷以明倫堂居殿後啟聖祠在堂右爲非制易明倫
堂爲啟聖祠復改建明倫堂於祠右并置射圃焉三十五年同知
蔣旭又捐俸重修尊經閣乾隆中生員童適恭捐鑄鼎鑪教授盧
錚置竽瑟鱣鼉各禮樂器又續修興文祠承祭齋至嘉道間經紳
士姚鳳儀等協修朽者新之弗如制者易之集物備器咸壯於觀
然前臨大街泮池櫺星門地仍狹隘也回逆時毀民居十餘戶移
街置照牆擴張而大之復增修拜台欄以大理石蓋僞守馬國忠

吳興園皆秀才之從賊者其良心固未盡泯也壬申克復廟額依然光緒四年同知夏廷燮復修葺之又備祭器與佾舞每春秋丁及誕辰親率諸生釋奠釋菜弗至者發學戒飭於是整齊嚴肅彬彬然有禮樂之意矣十一年同知卞庶凝復移建櫺星門泮池及兩柵是後紳管又改建承祭齋興文祠大成門諸處宏闊壯麗規模較前爲美盛云其制正殿七楹前置拜台環以石欄中爲甬道左右砌石階東西翼以兩廡外爲戟門額曰大成大成門外左爲名宦祠右爲鄉賢祠興文祠在名宦祠之左承祭齋在鄉賢祠之右前爲櫺星坊坊左曰義路右曰禮門坊之外鑿泮池琢石橋橋前置照壁壁面西街上鑲萬仞宮牆四字兩旁繚紅牆牆內餘地

頗宏敞牆左曰成賢坊後易額曰德配天地右曰養士坊後易額曰道冠古今正殿後爲雁塔坊再後爲崇聖祠祠後爲尊經閣閣下祀倉聖祠右爲明倫堂堂上置臥碑及訓飭士子文下爲射圃前置一坊額曰道義之門明倫堂右舊爲學官署光緒間移置崇聖祠之左廚房在大成門左倉房一在大成門右一在興文祠左拜台下及雁塔坊後古柏數章大可兩人合抱陰蔭翳天五百年前故物也至於一切典禮祭器歷朝有定制通國所同弗贅名宦祠

查舊府志名宦祀漢諸葛亮唐唐九徵明張統陳善姜龍陳用賓吳鵬蘇海震劉童吳憲劉宜春胡光李轍董璧汪舜民井震溫洪